

PRAYMER HINGGIL SA

SAHOD

AT

CHARTER CHANGE





INTRODUKSYON

Bungad sa manggagawa at mamamayan sa taong 2024 ang pahayag na “hindi muna madaragdagan ang sahod ngayong taon” - sahod na una pa lamang ay kakarampot at di na nakasasapat, at ang pakanang Charter Change ng rehimeng US-Marcos upang diumano palaguin ang ekonomya.



INTRODUKSYON

Sa gitna ng malubhang krisis sa kabuhayan,

- pagbubuyangyang ng likas-yaman, lakas-paggawa, mga batayang serbisyo at ang buong bayan sa pandarambong ng dayuhan at malalaking negosyo
- pag-ampat sa krisis ng mga imperyalistang bayan → ipasa sa malakolonya gaya ng Pilipinas at sairin ang rekurso nito
- Marcos vs Duterte - lantaran nang buwag ang alyansa at nag-aagawan sa estado poder

Bakit napakahalagang usapin ng sahod sa bansa?

Ayon sa [2021 Annual Family Income and Expenditure Survey](#), **sahod ang pangunahing pinagkukunan ng kita ng 52.7% (1 sa 2) ng mga pamilya sa Pilipinas.** Mas mataas ito ng 2.3% mula 50.4% noong 2018. Pinagtitiyay ito ng tala na [67.2%](#) ng pwersa ng paggawa sa Pilipinas ay mga manggagawang sinasahuran. **Bagama't kalahati ng bilang ng mga pamilya sa bansa ay umaasa pangunahin sa sahod, nanatiling masalimuot ang lagay ng sahod sa bansa.**



Ano ang kalagayan ng sahod ng manggagawang Pilipino?

Tatlo sa sampung (3 sa 10) manggagawa sa Pilipinas ay gumagampan ng *elementary occupations* at isa sa lima (1 sa 5) naman ay *service at sales workers*. Ang naturang mga trabaho ay kinakatangian ng mababang sahod.

Table 1. Average Monthly Wage Rates of Time-Rated Workers on Full-Time Basis in Selected Industries and Occupations, Philippines: August 2022 (Cont'd) (In Establishments Employing 20 and More Workers)		
2009 PSIC/ PSOC 2012 Update	Industry/Occupation	Average Monthly Wage Rate (PhP)
G46	Wholesale Trade except of Motor Vehicles and Motorcycles	
2121	Mathematicians and Actuaries	21,463
2122	Statisticians	23,892
2411	Accountants (including Auditors)	32,406
2431	Advertising and Marketing Professionals	31,816
3322	Sales Supervisors/Commercial Sales Representatives	21,932
4311	Accounting and Bookkeeping Clerks	19,638
4321	Stock Clerks	14,964
5230	Cashiers	14,670
5244	Contact Center Salespersons	18,091
5299 ^b	Shop Sales Assistants/Sales Demonstrators	13,499
9000 ^b	Elementary Occupations (Unskilled Workers)	12,738

Ano ang kalagayan ng sahod ng manggagawang Pilipino?

Mahihinuha rin ang kabansutan ng sahod sa Pilipinas kung itutumbas ito sa poverty threshold na mismong pamahalaan ang nagtakda.

Makikita sa table na ang buwanang katumbas ng minimum wage noong Setyembre 2023 sa lahat ng rehiyon ay hindi umabot sa poverty threshold na tinakda pa noong 2021.

Rehiyon	Poverty threshold (as of 2021)	Minimum Wage ^[1] (as of September 2023)
NCR	PhP 13,741	PhP 13,218.7
Region I	PhP 12,964	PhP 8,668
Region II	PhP 11,788	PhP 9,101.4
Region III	PhP13,160	PhP 9,968.2
Region IV-A	PhP 12,941	PhP 10,184.9
Region IV-B	PhP 10,967	PhP 7,692.85
Region V	PhP 11,531	PhP 7,909.55
Region VI	PhP 11,285	PhP 9,751.5
Region VII	PhP 13,008	PhP 9,426.45
Region VIII	PhP 11,187	PhP 8,126.25
Region IX	PhP 11,975	PhP 7,606.17
Region X	PhP 12,015	PhP 8,776.35
Region XI	PhP 11,709	PhP 9,599.81
Region XII	PhP 11,018	PhP 7,974.56
CARAGA	PhP 11,390	PhP 7,584.5
CAR	PhP 11,793	PhP 8,668
BARMM	PhP 11,789	PhP 7,389.47



Ano ang “real wage” at ano ang kabuluhan nito sa isyu ng sahod?

Ang real wage ay halaga ng sahod na may pagsasaalang-alang sa bilis ng pagtaas ng bilingin (inflation). Bukod sa mababa na ang sahod ng milyon-milyong mga manggagawa, ang tunay na halaga pa nito ay nasa palagiang pagbaba. Ito ay panandalian lamang napipigilan dahil sa minsanang umento sa sahod.



Ano ang “real wage” at ano ang kabuluhan nito sa isyu ng sahod?

Walang makabuluhang pagtaas ang real wage sa NCR. Hindi nahahabol ng minsanang umento sa sahod ang bilis ng pagtaas ng presyo ng mga bilihin. Ang ganitong trend ay makikita rin sa iba pang mga rehiyon kung saan mas mataas ang presyo ng mga bilihin na sinasabayan ng mas mababang pasahod.

Buwan	MW, NCR	CPI, 2018=100	RW
Hunyo 2022	570	112.2	508.021
Hulyo	570	112.3	507.569
Agosto	570	113.3	503.089
Setyembre	570	113.9	500.439
Oktubre	570	115.3	494.363
Nobyembre	570	116.1	490.956
Disyembre	570	116.6	488.851
Enero 2023	570	118.2	482.234
Pebrero	570	118.2	482.234
Marso	570	118	483.051
Abril	570	118.1	482.642
Mayo	570	118.1	482.642
Hunyo	570	118.4	481.419
Hulyo	610	118.6	514.33
Agosto	610	120	508.33
Setyembre	610	120.8	504.97

Ano ang “real wage” at ano ang kabuluhan nito sa isyu ng sahod?

Bagaman bumaba ang kabuuang implasyon sa Pilipinas mula **4.1% noong Nobyembre 2023** sa **3.9% noong December 2023**, tumindi naman ang hirap na nararanasan ng pinakamahirap na 30% ng ating mga kababayan na nakaranas ng mas matinding implasyon sa **bigas (21.4%, December 2023)**, iba pang pagkain gaya ng **gulay at karne at non-alcoholic beverages (7.4%, December 2023)**, **transportasyon (1.5%, December 2023)**, at **gastos medikal (3.2%, December 2023)**




Sa kabuuan, higit na mabigat na pasanin ang taas presyo para sa mga pinakamahihirap na Pilipino.

Mas mataas ang tantos ng inflation para sa mga 30% pinakamahihirap na pamilya sa bansa.



Inflation Rate, All Items, Aug 2022 - Aug 2023 (2018=100)

Source: Philippine Statistics Authority



Dagdag pasanin

Dagdag-pasahe sa MRT-LRT, tricycle at iba pang moda ng transportasyon.

Dagdag singil sa Philhealth → 5%; sa Pag-ibig - P100 → P200 kada buwan.

**Mahal ang gastusin sa
pagpaparaal ng mga anak ng
manggagawa, samantala
malalaking tapyas sa badyet sa
pampublikong edukasyon.**



Bakit makatwiran ang umento sa sahod? Ano ang ibig sabihin ng labor productivity?

Mula 2000, tuluy-tuloy ang pagtaas ng produktibidad ng mga manggagawang Pilipino. Sa kabila nito, barat ang umento sa sahod.

Noong 2000, ang labor productivity (current) sa bansa ay aabot sa PhP 418 kada araw samantalang ang average nominal minimum wage lamang noon ay PhP 181. Pagsapit ng 2018, ang labor productivity (current) sa bansa ay aabot na sa PhP 1,357 kada araw samantalang ang average nominal minimum wage ay nasa PhP 350 lamang.

Sa tunay na halaga, noong 2000, ang labor productivity (in constant 2018 prices) ay PhP 816 samantalang ang real wage ay nasa PhP 361. Pagsapit ng 2022, ang LP (in constant 2018 prices) ay umaabot na sa PhP 1,364 samantalang ang real wage naman ay nasa halagang PhP 349.

Ibig sabihin, ang **LP (current)** ay tumaas ng **225%** mula 2000 hanggang 2018 samantalang ang **nominal minimum wage** ay tumaas lamang ng **93%**

Sa kabilang panig, mula 2000 hanggang 2022, ang **LP (in constant 2018 prices)** ay tumaas ng **67%** samantalang ang **real wage** ay bumaba pa ng **3.6%**



Sino ang nakikinabang sa papataas na produktibidad ng manggagawang Pilipino?

Ang taunang kita ng **10% pinakamayamang pamilya** na may halagang PhP 2.15 trilyon ay halos katumbas ng **taunang kita ng 50% pinakamahirap na pamilya** na nagkakahalaga ng PhP 2.31 trilyon.

Ayon naman sa [Forbes noong Setyembre 2021](#), ang **50 pinakamayamang Pilipino sa bansa** ay may net worth na **USD 79 bilyon**.

Ang halagang ito ay mas malaki nang bahagya kaysa sa **kabuuang kita ng 70% ng lahat ng pamilya sa Pilipinas** para sa taong 2021



Bakit mababa ang sahod sa Pilipinas?

Ang mababang sahod sa Pilipinas ay mukha ng **neoliberal na balangkas sa ekonomiya** kung saan pinaluluwag ng pamahalaan ang kontrol nito sa mga usaping pang-ekonomiya.

Itinaguyod ito at pinalaganap ng magkasabay na administrasyong Reagan sa Estados Unidos at Thatcher sa United Kingdom.



Bakit mababa ang sahod sa Pilipinas?

Sa Pilipinas, sinasalamín ng ganitong balangkas ang **Wage Rationalization Act of 1989**.

Ang **Regional Tripartite Wages and Productivity Board** ang magtatakda ng umento sa minimum na sahod sa kada rehiyon na di lalagpas ng isang beses sa isang taon.

Nagbigay luwag ang iskemang ito para sa pamahalaan at mga may-ari ng kapital na **panatilihing mababa ang sahod upang mang-engganyo ng dayuhang pamumuhunan na hayok sa murang lakas paggawa.**



Ano ang epekto ng malawakang kawalang trabaho sa sahod? Paano naapektuhan ng kontraktwalisasyon ang sahod ng manggagawa?

Bagamat nitong mga nakaraang buwan, ipinagmamalaki ng gobyerno ang pagbaba ng unemployment rate, **kapansin-pansin ang pagkatapyas ng mga trabaho sa manupaktura at agrikultura, senyales ng pagbagsak ng ating kapasidad upang magbuo ng ekonomyang nakasandig-sa-sarili.**

Laganap ang kontraktwalisasyon para paliitin ang sahod at mga benepisyo.


Itinatayo ang mga enklabo at *special economic zones* sa buong bansa para sa malalaking negosyo. Sa sistemang freelance at sa sistema ng platform work (delivery rider, ride-hailing), pinapalabnaw ang kasalukuyang sistema ng pasahod sa “earnings” at “commission.”



Ano ang epekto ng mababang tantos ng pag-uunyon sa sahod?

Mula sa karanasan mismo ng manggagawa, maitataas lamang ang sahod kung magkakaisa at sama-samang kikilos ang mga unyon at manggagawa. **Hindi kusang ibibigay ng kapitalista at gobyerno ang pagtaas ng sahod.** Kailangan itong igiit bilang karapatan at ipaglaban.

Napakaliit na bilang lamang ng mga manggagawa ang may kakayahang makipag-negosasyon para sa mas mataas na sahod at dagdag benepisyo.



Bakit itinutulak ang ChaCha? Ito ba talaga ang sagot sa krisis ng lipunan?

Pinanghahawakan ng gobyerno na ang dayuhang pamumuhunan ang solusyon sa krisis sa ekonomya ng Pilipinas. Nakasalalay diumano sa pagbubukas ng ekonomya ang paglikha ng trabaho, pagtaas ng sweldo at kita, at pagpapababa ng presyo. Napakalayong mali nito.

Una, maling paniwalaan na masyadong mahigpit sa dayuhang pamumuhunan ang Pilipinas. Sa lagpas 50 taon, ipinapatupad ang mga patakarang neoliberal sa Pilipinas na sistematikong nagbubukas sa bansa sa dayuhang kapital.

Ikalawa, hindi bawas restriksyon ang nakakapanghikayat sa dayuhang pamumuhunan. Sa kabila ng pagkabukas nito, mas marami pa ring FDI sa Thailand, Vietnam at Indonesia.

Ikatlo, sa kabila ng pahayag ni Marcos na pagsabay sa kumpas ng globalisasyon ang pagbubukas ng ekonomya sa ilalim ng Charter Change, pinapangunahan ng US ang landas ng proteksyonismo (pagsasara o paghihigpit ng ekonomya) para sa kanyang sariling bayan. Sa katotohanan, ang ganitong klaseng paghihigpit at maigting na kontrol at restriksyon sa rekurso at ekonomya ang nagbunsod ng pag-unlad ng US at China mismo.

Ang Charter Change ay hindi solusyon. Ito ay mas masahol pang pagpapatupad ng patakarang neoliberal. Ang ChaCha ay pagsasaganap at paglelehitimisa sa mga patakaran na nauna nang sumagasa sa kabuhayan at batayang mga karapatan ng mga Pilipino.

Neoliberalismo ang

- **liberalisasyon** ng ekonomya at likas-yaman at pagpasok dayuhang kapital at produkto;
- **pribatisasyon** o pagbubukas ng pampublikong sektor katulad ng mga pampublikong yutilidad at serbisyo sa pamumuhunan ng dayuhan at pribadong korporasyon; at
- **deregulasyon** o pag-alis ng gobyerno ng kanyang regulasyon o kontrol sa mga sektor na ibinukas sa dayuhan at pribadong pamumuhunan.

Sa ubod, ang adyenda ng ChaCha ay ang pagpapaigting pang lalo ng pang-aapi at pagsasamantala sa manggagawa at mamamayang Pilipino. **Bibigyang-daan nito ang patuloy na pandarambong ng likas-yaman, pagpiga pang lalo sa lakas-paggawa ng manggagawang Pilipino para sa dambuhalang supertubo ng mga imperyalista.**



Ano ang Charter Change ni Marcos?

Sa kasaysayan, bawat rehimen matapos ng **EDSA People Power 1986** ay nagtangkang rebisahin ang Saligang Batas sa interes malalaking dayuhang kapitalista, malalaking lokal na negosyante, mga panginoong maylupa, at mga burukrata sa gobyerno.



Ano ang Charter Change ni Marcos?

Pamarang ng mga nagtutulak ng ChaCha na tanging mga economic provision lamang ang nais baguhin ng panukala, at hindi gagalawin ang mga political provision gaya ng term limits at form of government.

HINDI MAITATAGO ANG RIBALAN SA PULITIKA NG MGA MARCOS AT DUTERTE.

Ang ChaCha rin ay direktang tugon ni Marcos upang ampatan ang pandaigdigang krisis ng imperyalismo. Layon nitong isulong ang interes ng imperyalismong US para sa higit na kontrol sa ekonomya ng mga malakolonya gaya ng Pilpinas at isemento ang geopolitikal nitong paghahari sa Asya-Pasipiko at sa buong daigdig.



Ano ang gustong baguhin sa 1987 Constitution?

RBH 6 - bibigyang kapangyarihan ang Kongreso na magpasa ng mga batas na maaaring magpalaki (hanggang 100%) ng dayuhang pagmamay-ari at kontrol sa

- public utility gaya ng tubig, kuryente at transportasyon,
- mga institusyon sa batayang edukasyon, at
- industriya ng advertising.



Ano ang magiging mga epekto nito sa kabuhayan?


Ang 100% na pagmamay-ari ng mga dayuhan, higit lalo ang mga dambuhalang dayuhang korporasyon, sa mga nabanggit na sektor ay **magbibigay-laya sa mga ito na itakda ang presyo ng kanilang serbisyo o produkto batay sa kanilang maka-tubong interes.**

Sa kasalukuyang anyo ng PUVMP, ang mga PUV units ay kalakhan na aangkatin mula sa mga dayuhang korporasyon. **Kung uusad ang ChaCha, pati ang prangkisa at operasyon ng mga ruta ng PUVs ay maaari na rin pagmay-arian ng mga dayuhang empresa.**



Ano ang magiging mga epekto nito sa kabuhayan?

- Pag-alis sa ligal na sagka sa pagbili, pagmamay-ari at kontrol ng dayuhan sa pagmimina at iba pang aktibidad upang **siyasatin, “paunlarin,” at gamitin ang likas-yaman at lupa sa bansa.**
- Pag-alis sa sa **karapatan ng manggagawa sa nakabubuhay na sahod** at hati sa tubo sa produksyon; sa mga maralitang lungsod na hindi sila makararanas ng di-makatarungang demolisyon
- Huhubugin rin sa **kolonyal at maka-imperyalistang pag-iisip ang kabataan at mamamayan** kapag na-kontrol ng mga dayuhan ang edukasyon at masmidya.



Ano ang magiging epekto nito partikular sa sahod?

Isang mayor na konsiderasyon ng mga dayuhang namumuhunan ang halaga ng magiging gastos nito sa pagpapasahod. Magkagayon, ang panukalang ChaCha ay magbubunsod nang higit na pagkabansot ng sahod.

Ang ganitong pleksibilisasyon ng sahod sa ilalim ng Two-Tiered Wage System ay nakaturol upang maging 'globally competitive' diumano ang sistemang sahurang ng bansa. Nangangahulugan ito na dinisenyo ang naturang iskema upang makaengganyo ng dayuhang pamumuhunan.



Ano ang magiging epekto nito partikular sa sahod?

Kaya naman magiging natural na karugtong ng ChaCha ang higit na pagpapabansot sa sahod.

Mabubuo ang disenyo ng isang makadayuhang ekonomiya sa pamamagitan ng tambalan ng pleksible at mababang pasahod at kawalan ng restriksyon sa dayuhang pamumuhunan.



Ano ang magiging epekto nito sa pamamahala at aspetong militar? sa kultura?

Layong baguhin ng ChaCha ang **porma ng gobyerno (form of government)** upang pahigpitin ang kontrol ng malalaking negosyante at panginoong maylupa sa buong makinarya ng estado. Babaklasin din ang **term limits** para sa unlimited na paghahari ng mga dinastiyang pulitikal na hawakan ang gobyerno at ang kaban ng bayan.

May mga panukala ring **tanggalin ang representasyon ng kabataan, nakatatanda at kababaihan sa lokal na pamahalaan.** Aalisin rin ang probisyon sa Konstitusyon upang habulin ang nakaw na yaman ng mga Marcos at kanilang mga kroni.



Ano ang magiging epekto nito sa pamamahala at aspetong militar? sa kultura?

Papawiin rin nito ang pagbabawal sa pasilidad militar at armas nukleyar ng US at iba pang imperyalista. Papalawakin nito ang geopolitikal at ekonomikong interes ng US at mga kaalyado nito sa rehiyon at daigdig. Ihahanda ang Pilipinas bilang forward base ng US sa panahong sumiklab ang inter-imperyalistang digmaan.

Papahinain rin nito ang proteksyon sa karapatang pantao laban sa Batas Militar na nakasemento sa Konstitusyon matapos ang pag-aalsa ng EDSA. Rerebisahin ang kasaysayan upang tabunan at burahin ang madugong rekord ng mga Marcos, at mga kahayupan ng naghaharing uri at imperyalismo laban sa mamamayan.



Ano ang magiging epekto nito sa pamamahala at aspetong militar? sa kultura?

Sa layon na patahimikin ang pagbatikos at paglaban ng mamamayan, at isulong ang ekonomiko at pulitikal ng imperyalismong US, lalo ring papahintulatan at ilelehitimisa ang pandarahas at pasismo isinasagawa ng estado ang **samut-saring paglabag sa karapatang pantao**.

Inilulunsad ng rehimeng US-Marcos ang **gerang kontrainsurhensya na pinapamunuan ng NTF ELCAC, AFP at PNP upang durugin diumano ang armadong paglaban sa kanayunan**.

Itinatangi ng hibang na gerang ito ang katotohanan na ang ugat ng armadong sigalot sa Pilipinas ay ang kawalang-lupa, kahirapan, kagutuman at karahasan na dinaranas ng malawak na masang anakpawis.



Susi ang pagpapalakas sa kilusang unyon upang maikasa ang kilusang protesta hanggang sa kilusang welga at ***lahatang-panig na maipaglaban*** ang makabuluhang dagdag-sahod, nakabubuhay na sahod (o family living wage) at iisang pambansang minimum na sahod (national minimum wage).


May laban sa mga larangan ng:

- Collective bargaining agreement (CBA)
- Mga regional wage board (RWB)
- Wage hike at NMW legislation sa Senado at Kongreso
- Paniningil at pagpapanagot kay Marcos



Biguin ang Charter Change ni Marcos.
Ilantad na ang makaimperyalistang
interes sa likod nito ay higit na
magpapasahol sa matagal nang
hikahos na kalagayan ng sahod sa
Pilipinas.

**Ang makikinabang lamang dito ay
mga bulok na mga dinastiyang
politikal, ang kanilang mga business
crony, at kasabwat na dambuhalang
dayuhang korporasyon at
imperyalistang bansa.**






ANO ANG PANGMATAGALANG SOLUSYON SA KAHIRAPAN AT KAGUTUMAN SA PILIPINAS?

Malayo sa perpekto ang Konstitusyong 1987. Gayunpaman, bunga ito ng pagsisikap ng mamamayang Pilipino at mga lider na anti-diktadura laban sa mga abuso ng unang rehimeng Marcos. **Kinikilala nito ang kahalagahan at aktibong interbensyon ng estado para pagsilbihin ang ekonomya sa ikauunlad ng bayan at ang paglalatatag ng mga proteksyon sa karapatang pantao.**

Ang tangkang rebisyon at pagwasak dito ng rehimeng Marcos Jr ay di makalulutas sa mga batayang suliraning panlipunan, kundi **magpapasidhi lamang ng dayuhang kontrol, pagpapanatili sa atrasadong ekonomya at higit na kapangyarihan sa mga lokal na naghahari-harian.**





Ang kinakailangan ng Pilipinas ay ang ng tunay na repormang agraryo, pambansang industriyalisasyon, proteksyon sa kanyang likas-yaman para siguraduhin ang sustenableng pag-unlad, pagkilala sa mga karapatan ng masang anakpawis, mahusay na paggamit ng kapital para sa pag-unlad, at nagsasariling patakarang panlabas.



*Sahod, Hindi Chacha!
Ipaglaban ang nakabubuhay na
sahod!*

*Biguin ang ChaCha
ng rehimeng US-Marcos!
Lupa, kabuhayan, karapatan at
kasarinlang, hindi higit na
paghahari ng dayuhan at iilan!*